

ՀԱՅ-ԱՍՈՐԱԿԱՆ ՄԻՋԵԿԵՂԵՑԱԿԱՆ ՀԱՐԱԲԵՐՈՒԹՅՈՒՆՆԵՐՆ
ԸՍՏ ԳՐ. ՄԱԳԻՍՏՐՈՍԻ

ՍԱՐԳԻՍ ՄՆԻԹԱՐՅԱՆ

Ասորական միաբնակ եկեղեցին վերջնականապես ձևավորվեց VI դ., երբ Հակոբ Զանդալուսի կողմնակիցները 567 թ. առանձնացան Անտիոքի պատրիարք Պողոսի հետևորդներից («Հակորիկյաններ» և «Պողոսյաններ»)՝ թե՛ քրիստոնեությունից տարածման վաղ շրջանում, թե՛ դրանից հետո մեր եկեղեցիները մշտապես համագործակցել են: Հատկապես Հակորիկները լավ հասկացան, որ արտաքին և ներքին երկպառակությունների դեմ իրենք կարող են հաջող պայքար մղել միայն հայերի հետ համատեղ: Գր. Մագիստրոս Պաշլավունին (990–1058) այն քաղաքական գործիչն էր, ով առավել լավ էր գիտակցում այս գործի կարևորությունը և մեծ հետաքրքրություն ցուցաբերում այդ հարցում: «Բազմակողմանի ղիտելիքների տեր, աշխարհիկ և կրոնական գրականությունը հավասարապես քաջատեղյակ այդ հռչակավոր իշխանը»², հանրագիտակ մտածողը, իմաստասերը, պետական և ռազմական նշանավոր գործիչը հայ կյանքի վայրիվերումների կենտրոնում էր, անմիջական մասնակիցն ու հիմնական դերակատարներից մեկը³:

Պաշլավունյաց իշխանը միջպետական, ազգամիջյան և միջեկեղեցական փոխհարաբերությունների հարցերում առաջնորդվում էր ազգային-քաղաքական շահագրգռություններով:

XI դ. բարդ էին հարաբերությունները բյուզանդացիների հետ՝ Անիի դեպքերի առնչությամբ, ասորիների հետ մեր և նրանց ցրվածության ու դավանաբանական մանր-մունր տարաձայնությունների պատճառով, բայց երկուստեք կասկերը շարունակվում էին⁴: Բյուզանդական կայսրերն ու պատրիարքները երբեք չդադարեցրին իրենց պայքարը հայ եկեղեցու դեմ՝ նրան իրականում ենթարկելու Պոլսի պատրիարքությանը՝ ծավալելով այդ ընթացքում սուր ու երկարատև դավանաբանական վեճեր⁵, որոնք արտաքուստ կրում էին ծիսական խնդիրների շուրջ ծագած տարակարծությունների բնույթ: Այդ ժամանակ հայոց թագավորությունների թուլացումը և արագ անկումը բյուզանդացիների սագրանքով (Արծրունիներ, Բագրա-

¹ Օտար աղբյուրները Հայաստանի և հայերի մասին. հ. 8 (Ասորական աղբյուրներ, թարգմ., առաջ. և ծանոթ. շ. Մելքոնյանի). Երևան, 1976, էջ 20, 342–343:

² Ա. Ա. ր. և շ. ա. տ. յ. ա. ն. Գրիգոր Մագիստրոս. – Հայ մշակույթի նշանավոր գործիչներ. Երևան, 1976, էջ 202:

³ Ա. Մ. ի. ի. թ. ար. յ. ա. ն. Գրիգոր Մագիստրոսի կյանքը և գեղարվեստական ժառանգությունը. Երևան, 2001, էջ 17–21:

⁴ Տե՛ս Ե. ք. Պ. Ե. տ. ր. ո. ս. յ. ա. ն., Հայ եկեղեցու պատմություն. հ. Ա, Հաղբատ, 1990, էջ 82–85:

⁵ Ա. Ա. լ. Ե. ք. ս. ա. ն. յ. ա. ն. Հայ միջնադարյան նամակը (4–14-րդ դարեր). Երևան, 1997, էջ 68–72:

տունիներ, Աբասյաններ) մեծապես թուլացրեց Հայոց հայրապետական Աթոռի դիրքերը ևս: 1047 թ. Պետրոս կաթողիկոսը (1019–1058) տարվեց Պոլիս՝ որպես պատվավոր պատանդ, մինչև որ 1051 թ. Ատոմ Արծրունու ազդու միջամտությամբ տեղափոխվեց ըյուզանդահայտակ Սեբաստիա: Այդ ընթացքում պարզ դարձավ, որ Հայոց հայրապետը և բարձր դասը դավանաբանական զիջումների չեն դնա: Իրավիճակը չփոխվեց նաև Խաչիկ Բ (1059–1065) կաթողիկոսի օրոք, որին Կոստանդին Դուկասը երեք տարի պահեց բանտում: Բյուզանդացիք ավանդաբար հայերին վերաբերվում էին որպես անվստահելի տարրի, իսկ հաճախ ուղղակի որպես աղանդավորները⁶: Կայսրության վարած քաղաքականությունը հանգեցրեց նաև Հռոմի եկեղեցու անջատմանը 1054 թ. էլ ավելի խորացնելով քրիստոնեական եկեղեցիների հակամարտությունը: Իրականում սկսվել էր քաղաքական ու եկեղեցական մի ճղնաժամ, որը հույները փորձում էին լուծել բռնի միջոցներով՝ դրանով հասնելով հակառակ արդյունքի:

XI դարի հայ-ասորական միջեկեղեցական հարաբերությունների վերաբերյալ քիչ փաստաթղթեր են պահպանվել: Դրանցից են Գր. Մագիստրոսի ասորիների կաթողիկոս Հովհան է Դասրիգոյային⁸ (1001–1058) ուղղված Կէ և ԿԸ թղթերը: Դրանցում Պահլավունյաց իշխանը անդադառնում է թոնդրակ ավանի վրա իր կատարած հարձակման, աղանդավորներին տեղահան անելու, մի մասին դարձի բերելու և այլ վայրերում վերաբնակեցնելու մանրամասներին: Իշխանը դաժանություններ չի կատարել հասարակ մարդկանց, ծերերի, մանուկների և կանանց նկատմամբ: Աղանդավորները բողոքել են ասորիների կաթողիկոսին ամենայն հավանականությամբ նրանից պաշտպանություն հայցելով: Իսկ վերջինս Գր. Մագիստրոսից ցանկացել է իմանալ բուն ճշմարտությունը, որպեսզի վճռի իր անելիքները: Պահլավունյաց իշխանը Կէ թուղթը վերնագրել է այսպես. «Պատասխանի թղթոյն կաթողիկոսին Ասորուց ի ժամանակին, յորժամ էր դուքս ի Վասպուրական և ի Տարօն. զկնի բառնալոյն զՄանիքեցիսն յաշխարհէն Յունաց, և ի Թոնդրակաց մնացեալսն նոցա կործանեալ ազգն. չորան առ կաթողիկոսն Ասորուց ի քաղաքն Ամիթ, զի թերևս խաբէութեամբ հաւանեցուցեն զնա»⁹: Այն հանդիսավոր-հարգական ոճ ունի: Աստվածաշնչյան բազում օրինակներով նա ցանկանում է ցույց տալ, որ իր արարքը թոնդրակեցիների հանդեպ բխում է քրիստոնեություն պահանջներից: Նրանք ծանր մեղք են գործել՝ շեղվելով ուղիղ դավանությունից, կործանելով ոչ միայն սեփական անձը, այլև ուրիշների: Նախախնամությամբ ձեռքով կաթողիկոսն ակամա մասնակից է դարձել մոլորյալների դեմ մղվող սուրբ գործին «զի ճակատիցիս և դու զկնի այլոց հարցն սրբոց քում նախնեացն ընդդէմ աստուածամարտն որոց աղանդաւոր դիւթիւթեան կիւսոյ գաղտադող բաղբաղանաց այսպիսեաց»¹⁰: Ինչպես այլ առի-

⁶ Մ ի օ ա յ ե յ Բ ա ռ թ ի կ յ ա ն. Հայ աղանդավորների հետքերը Հյուսիսային Հունաստանում. — ՀՄՄԻ ԳԱ «Տեղեկագիր» հաս. գիտ., 1956, N3, էջ 76-80:

⁷ Տե՛ս History of the Christian Church, v. 4, Massachusetts, p. 301–320.

⁸ Տե՛ս Գրիգոր Մագիստրոսի թղթերը (այսուհետև՝ թղթեր). Ալեքսանդրապոլ, 1910, էջ 283:

⁹ Նույն տեղում, էջ 148:

¹⁰ Նույն տեղում, էջ 152:

թով, այնպես էլ այստեղ աղանդավորները մեղադրվել են կախարհությունների մեջ, ինչը մահացու մեղք էր համարվում, և այդ դեպքում ամենախիստ պատիժներն էին սահմանվում նրանց հանդեպ: Որպես հաստատումն իր ասածի, Գր. Մագիստրոսը կոչ է անում, որ Ս. Հայրը կարգա երանելի վարդապետ Անանիայի (Նարեկացու) գրվածքը¹¹, որպեսզի պարզ տեսնի, թե ինչպիսի «անբարի բարեձևություններ» և «խորամանկ խաբեություններ» է ծագել այն: Մի՞թե իրենց գործը չէ նրանց ճիշտ ճանապարհի բերելը հակառակ աղանդավորների պնդումների: Նա խոսում է աղանդի սկզբունքների ու յուրահատկությունների, աղանդապետների հայացքների ու դործունեությունների մասին¹²: Իրեն հաջողվել է երկու աղանդապետների՝ Պողիկարպոսի և Նիկանորայի օգնությունով բազմաթիվ թղթեր ու գրություններ ձեռք բերել հերձվածի վերաբերյալ: Դա կարևոր հիշատակություն է երբևէ այդօրինակ գրականության գոյությունը մասին¹³: Ինչպես ինքն է դարձի բերել մոլորյալներին, այնպես էլ թող կաթողիկոսը վարվի. «...եկեալ ընկալցին զմկրտութիւն, խոստովանեալ զյանցանս իւրեանց. ապա եթէ ոչ, մի՛ ողորմեցիս նոցա և մի՛ միաբանեսցիս և մի՛ արասցես տեսութեան»¹⁴: Իր հարկի տակ չընդունելով և հալածելով աղանդավորներին՝ Հայ և ասորի եկեղեցիները պիտի կատարեն հաջորդ կարևոր քայլը՝ կրկին սերտացնեն հարաբերությունները: Այդպիսի մի փորձ եղել էր Հովհան Օձնեցու (717–718) օրոք, և հաջորդը կատարվում էր XI դ. կեսերին: Բուն իրադարձությունները կապված են 1051 թ. և նրան հաջորդած մի քանի տարիների հետ, ինչպես նշում է Կ. Կոստանյանցը¹⁵, և ոչ թե 1058–1059 թթ. հետ, ինչպես ենթադրում է Ե. Տեր-Մինասյանը¹⁶: Բույր եկեղեցիների մերձեցման և համագործակցության հարցն առաջագրելիս Մագիստրոսը հիշում է տեր Զաքարիայի օրերը (855–876), երբ անհրաժեշտ էր վերամիավորվել, և երկու եկեղեցիները սկսեցին համագործակցել¹⁷: Մի բան ակնհայտ է. մերձեցումը տեղի է ունեցել այն դարերում, երբ կայսրությունը հալածանքներ է սկսել կա՛մ Հայ, կա՛մ ասորի եկեղեցիների դեմ թե՛ առանձին-առանձին, թե՛ միասնաբար: Ավանդական կապերին վերադառնալու պահանջը երկուստեք անհրաժեշտ էր, և Մագիստրոսը շեշտում է դա ու նշում, որ աթուակից եկեղեցիները և քահանայապետերը «առ մեզ և ի մերում հայրապետանոցի քո սրբազանութիւնդ որպէս սրբոյն Կիւրեղի և երիցս երանելեաց հալցն, որ յԵգիպտոսն են, այնպէս համարիմք աթոռակից, պատարադակից մանաւանդ եթէ քահանայակից, ձեռնադրինք և ձեռ-

¹¹ Ա. Ն ա Ր Ե Կ ա ց ի. Գիր խոստովանութեան. Վաղարշապատ, 1892:

¹² Ս. Մ ի թ ա Ր յ ա ն. Գր. Մագիստրոսի կյանքը..., էջ 32–40:

¹³ Ա. Ե Ր Ի Գ Յ ա ն. «Փորձ», Թիֆլիս, 1880, N10, էջ 80–115:

¹⁴ Թղթեր, էջ 163:

¹⁵ Նույն տեղում, էջ 102–103, 283:

¹⁶ Ե. Տ Ե Ր - Մ ի ն ա ս յ ա ն. Հայոց եկեղեցու Հարաբերությունները ասորոց եկեղեցիների հետ. Էջմիածին, 1908, էջ 238–239:

¹⁷ Տեր Զաքարիա Զագեցու (855–876) օրոք սրվեցին Հայ-բյուզանդական միջեկեղեցական հարաբերությունները, քանզի Փոտ պատրիարքը (857–867, 877–886) տեր Զաքարիային ուղղված նամակներով պահանջում էր ղեկումներ, որոնք բնականաբար չարվեցին: Այդ ժամանակ Հայաստանում էր Նանա ասորին, որը նույնպես ծանոթացավ Փոտի թղթերին և մասնակցեց Շիրակավանի 862 թ. ժողովին: Այստեղ կայացավ մի նոր միություն երկու Հայ և ասորի եկեղեցիների միջև, որը պիտի հակազդեր բյուզանդական ճնշումներին: Հենց այդ մասին է խոսում Գր. Մագիստրոսը (տես Մ. Չ ա մ չ Ե ա ն ց. Պատմութիւն Հայոց. Հ. Բ. Երևան, 1984, էջ 685–689):

նադրենք, և զոր ինչ բոլոր քահանայագործութեան հետեւին»¹⁸: Որոշ շփոթ էլ առաջացել է հայրենի ավանդները չպահպանելու պատճառով, ուստի կուզենար, որ համադրելով իրենց ծեսերը՝ ճշգրտումներ կատարեին: Այդ մասին կխոսեն, երբ շուտով ինքը կհանդիպի Սրբազանին: Երևում է, որ միջեկեզեցական մերձեցման խնդիրներում Գր. Մազիսարոսը որոշ լիազորություններ է ստացել տեր Պետրոսից, այլապես ինքնագործունեությունը չէր զբաղվի: Ի դեպ, հիշվում է նաև այն մասին, որ նմանատիպ մի թուղթ-բողոքագիր էլ աղանդավորները հղել են Պետրոս կաթողիկոսին: Մյուս կողմից՝ բյուզանդական կուսակալը, որ երեկվա Անիի սպարապետական տան ներկայացուցիչն է, ձգտում է գտնել նոր նախադրյալներ հայոց կորսված պետականության վերականգնման համար: Բացառված չէ, որ հայոց կաթողիկոս Պետրոսի բռնի մահվան դեպքում հայերը նոր կաթողիկոսի ձեռնադրման փորձ կատարեին ասորի հոգևոր առաջնորդի միջոցով, ինչպես հայերն էին նման վտանգի դեպքում ձեռնադրում ասորի կաթողիկոսներին՝ սատարելով ասորի ժողովրդին¹⁹:

Հեռատես Գր. Մազիսարոսը շեշտում է, որ հայ եկեղեցին հավատարիմ է Պողոս և Պետրոս առաքյալների արևմտյան աշխարհում և Հռոմում հաստատված սկզբունքներին, բայց այդ ամենը վերցված ճշմարիտ վարդապետությունից և ոչ հետագա ազավաղումներով, ինչի մասին գրում է նաև ասորի հեղինակ Բար-Շամովեն: Վկայակոչելով տնօրինական (սուրբ) վայրերը և սուրբ հայրերի դրվածքները հաստատում է իր հավատարմությունը դրանց՝ օգտագործելով երգման բանաձև: Իր նամակում ասորիների կաթողիկոսը ցավով խոսել է իրենց ազգի փոքրաթիվ լինելու մասին: Իշխանն այդ առիթով նկատում է, որ դրա պատճառը «ի տկարություն է աւանդութիւն ամուսնութեան սակս նուազութեան ազգիդ ձեր ի մէջ այլազգեաց, զոր հնարն է մաքրել»²⁰: Խառն ամուսնությունների պատճառով փոքրացել է ասորի ժողովուրդը, բայց վիճակը կարելի է շտկել:

ԿԸ թուղթն ուղղված է թոնդրակեցիներին: Այն հանգիմանանքի խոսք է աղանդավորների մասին, որոնք համառորեն չեն հրաժարվել իրենց մոլորություններից: Գ. Տեր-Մկրտչյանը նկատում է, որ «հայկական մտածողության միակ արտագրությունը, թեպետ աղանդավոր և հակաուղղափառական մտածողությունը, որը գուրս եկավ Հայաստանի սահմաններից, տարածվելով հեռուն՝ Փոքր Ասիա, Միջագետք, Բալկանյան թերակղզի... թոնդրակեցիների աղանդն էր»²¹: Իսկապես, X–XIV դդ. մտավոր առաջնութեամբ և Վերածնական միտքը մեծապես կապված էր այս՝ որոշ իմաստով աշխարհիկ մտածողության հետ²²:

Իր թղթում Գրիգոր մեծ իշխանը հանգիմանում է թոնդրակեցիներին, որ խաբել ու իրենց չարագործություններին մասնակից են դարձրել Սուրբ կաթողիկոսին. «Բայց եթէ զհարգ համարձակեցաք առ սուրբը և երանելիդ

¹⁸ Թղթեր, էջ 163:

¹⁹ 1264 թ. Սսի Մայր եկեղեցում ձեռնադրվում է ասորիների վերջին Հակոբիկ կաթողիկոսը՝ Հովհան Բար-Մաադանին (1252–1263) (տե՛ս Ե. Տեր-Միսիսյան, նշվ. աշխ., էջ 268–288):

²⁰ Թղթեր, էջ 164:

²¹ Գ. Տեր-Մկրտչյան, Հայագիտական ուսումնասիրություններ. հ. Ա, Երևան, 1979, էջ 219:

²² Մ. Աբեղյան, Երկեր. հ. Դ, Երևան, 1970, էջ 17–32:

մատչել քահանայապետ, զի և զդա հաւանեցուցէք խաբել: Ղի յեղբարց և յաթոռակցաց որոշեսցի կամ անգոսնեսցի»²³: Թող ծանր վիճակի մեջ չգցեն նրան, այլ իրենք ուղղվեն հեռանալով կուրաշավիղ ճանապարհներից: Զգիտակցելով իրենց կործանումը՝ նրանք կործանման պատճառ են դառնում ուրիշների համար: Եթե ոչ, թող հեռանան ասպարեզից՝ որպես կորստյան զավակներ:

Եկեղեցիների մերձեցման խնդիրը XI դ. կեսերին կարևորվում էր նաև արտաքին վտանգի դեմ դիմակայելու անհրաժեշտությունով: Դա մի կողմից աղանդավորների դեմ համախմբված պայքարով էր պայմանավորված, մյուս կողմից՝ կայսրության հարուցած հալածանքներով: Արդյունքում ձևավորվում էր մի ընդդիմադիր ուժ, որը պիտի կարողանար դիմակայել գալիք փորձություններին²⁴:

Հայ-ասորական եկեղեցական կապերի ամրապնդման առիթով ասենք նաև, որ Գր. Մագիստրոսը թարգմանություններ է կատարել ասորերենից: Շարունակելով մաշտոցյան ավանդները՝ նա գրում է. «...եւ եթէ տակաւին կամեսցի Տէր երկարանալ մեզ ի կենցաղումս, բազում հոգս յանձին կալեալ զմնացեալսն բոլոր Յունաց և Ասորոց թարգմանել ոչ դանդաղեցայց»²⁵: Բարձրագույն դաստասերը չէր կարող չչտապել: Ծերություն օրոք անհրաժեշտ էր ավարտել հունարեն և ասորերեն երկերից արվող թարգմանությունները: Ցավոք, նա ոչինչ չի հայտնում հենց ասորերեն թարգմանությունների ո՛չ հեղինակների, ո՛չ նրանց աշխատությունների մասին: Մի բան, սակայն, պարզ է. դրանք եղել են նշանավոր հայերի կարևորագույն աշխատություններ, որոնք գուցե մեր օրերն են հասել, բայց առանց թարգմանչի անվան հիշատակություն: Իսկ Մագիստրոսի ջանքերը հայ կյանքը բարելավելու, հայ եկեղեցին ճգնաժամային դրությունից դուրս բերելու համար իզուր չեն անցել: Նրա սերունդները՝ Պահլավունիները, հետագայում դարձել են կաթողիկոսներ՝ շարունակելով իրենց հայերի ավանդները:

АРМЯНО-АССИРИЙСКИЕ МЕЖЦЕРКОВНЫЕ ОТНОШЕНИЯ ПО ГР. МАГИСТРУ

САРГИС МХИТАРЯН

Р е з ю м е

Армяно-ассирийские межцерковные связи берут начало в период раннего распространения христианства. С 567 г., когда Акоп (Яков) Занзалос основал ассирийскую монофизитскую церковь, эти взаимосвязи получают новое значение.

²³ Թղթեր, էջ 166:

²⁴ Գր. վ. Մագիստրոսի. Ընտրյալը Աստուծո Ամենայն Հայոց կաթողիկոսի ընտրությունը. Երևան, 1995, էջ 70–76. նաև Ե. ք. Պետրոսյան. նշվ. աշխ., էջ 90:

²⁵ Թղթեր, էջ 66:

ние. В XI в. наблюдается новый этап в развитии армяно-ассирийских отношений, которые были обусловлены. 1. борьбой против ереси, распространяемой тондракидами, и вытеснением их из жизни армянских и ассирийских общин; 2. борьбой против агрессии византийской церкви, организованной Византией. В своем послании предводителям еретиков и в послании ассирийскому патриарху Григор Магистр (Магистрос) пишет об истоках ереси, о географических границах ее распространения и идеологической направленности, он подчеркивает антихристианскую сущность ереси и ее опасность для общественной жизни.

THE RELATIONS BETWEEN ARMENIAN-ASSYRIAN CHURCHES ACCORDING TO GR. MAGISTER

SARGIS MKHITARYAN

S u m m a r y

The relations between Armenian-Assyrian churches begin in early times of spreading the Christianity. Since 567 those realations have got a new meaning, when Hakop Zanzalos founded monophysite Assyrian church. A new period of realations between the churches began in the 11th century, which was connected with: a/ the fight against the Tondrac's sects to make the sects leave Armenian and Assyrian inhabitations, b/ the fight against the attacks of the church of the Byzantium which had been stately organized. In his letters to the leader of Assyrian churches and the leaders of the sect famous thinker and army commander Grigor Magister speaks of the sect, its geographical regions and ideological ways too, noticing its antiChristian meaning and its danger for the public life.